

Usia bukan halangan Jin Wei pamer ketangkasan

BH 29/5/18 MS.04

Pemain perseorangan wanita negara, Goh Jin Wei tidak menjadikan faktor usia terlalu muda sebagai alasan aksi mengecewakan ketika menentang Indonesia dalam perlawanan pembukaan Kumpulan D Piala Uber.

Malah pemain berusia 18 tahun dan juga bekas juara remaja dunia itu percaya dia mempunyai cara tersendiri untuk menjadi lebih matang.

Isnin lalu, Jin Wei mendahului dengan tujuh mata di set pertama menentang Gregoria Mariska Tunjung, sebelum tumpas 20-22, 16-21 dalam aksi perseorangan kedua, seterusnya membolehkan Indonesia mendahului 2-1.

Indonesia berjaya mencatat kemenangan 3-2, tatkala meletakkan Malaysia dalam keadaan genting untuk kekal selamat dalam saingan Piala Uber sebelum berdepan juara 14 kali, China pada hari seterusnya.

Jin Wei berjaya menebus kekecewaan pada aksi kedua, apabila mengejutkan pemain nombor lapan dunia, He Bingjiao 21-9, 17-21, 21-13 namun ia tidak cukup untuk menghalang penyandang juara itu mencatat kemenangan 1-4.

Tak kesampaian

Kekalahan itu menyaksikan harapan Malaysia untuk mara ke pusingan suku akhir tidak kesampaian.

"Ia bukan disebabkan faktor usia. Kita tidak bercakap soal senior ataupun pemain muda dalam pasukan ini," katanya yang mengalahkan pemain Perancis, Yaelle Honyaux 21-7, 21-0 dalam perlawanan pertama aksi terakhir Kumpulan D di IMPACT Arena, Bangkok semalam.

"Semua orang mempunyai tanggungjawab dan jika saya gagal untuk meraih mata yang sepatutnya saya gapai itu adalah saya sendiri."

Dalam pada itu, Jin Wei yang juga pemenang pingat emas Sukan SEA Kuala Lumpur, belum memikirkan mengenai pembabitannya dalam aksi Kejohanan Remaja Dunia di Kanada November depan.

